

**Maki Nasumo Naña Pol Siri  
Pa Pan Li Nalelagaena Wa Lala  
Nae Garu  
TESALONAIKA  
Visayuena Na Tusi Nene**

*Komþasnen suniena plas na tusi nini*

Pulkumali keviu nene Tesalonaika naga pulkumali keviu na provens nene Masetonia, naña mēke vatanon Parin Suþe keviu nae Rom sumo. Pogos naña Pol molue Piliþae, pa ma Tesalonaika mlologon lologena wo e yo nene, ana sumāre nene siaria. Ana siraunia pe yam piyavi manene re poli, lus nae Israel laþasa e yo nene apisa karea, la apieluenia komin naña apisu sane yaru moki naña pe ape lus nae re Israel poli, nanua sumo la amloge kiela vianiena lala, ana pogos naña amloge lologena wo naña Pol pisawalia, ana amlelaga e Yesu. Ana lus nae Israel la nene sinela kari Pol, ana aṁnelua e yo nene, ana pae pulkumali si tai, Perea. Siraunia, naga pa tol pupia pulkumali naña Koren, naga mloge lologena kiena li nalelagaena lala nae Tesalonaika e kiena erau Timote, naña miyumaē ke amio naga.

Pol siri þesan kiena maki nini pa li nalelagaena lala nae Tesalonaika vena visirluaen kiela sitomiena, a vena kila meraravan va li nalelagaena lala nae yo nene sape naga sitom la maga, a Ntewa sike amio la. Naga pisa potena pa

Ntewa komin naga mloge sape asuñña amlelaga ke m̃arera e Ntewa, a sinela sii ke yaru lala, a pisa panila vena la asitoññal si kiena ðelaga wo e pogos naña sike amio la, vena atavevea.

A naga pisa tam̃e kiela viunena lala naña apiyun tania, asape yoko Yesu wasuþe si ve sanape. Sinelan asape akilia meraravan sane visae yaru naña marþan þesa ana Yesu ve vitom re wa, yoko tol malena naña ve uro re, pona peraga. A sinelan akilia naña yoko Yesu wasuþe pogwai. Pol pisaruru panila, sape monar ayuññae ga, naña kiela sitomena la varuru ga suñña, a naña aligan kiela sitomena lala suññalu m̃arera e Yesu vena asuññate, vano vano-o tol pogos naña naga wasuþea.

*Komþasnen tusi la na nini*

Visena þesa 1:1

Pol kekaran la a pisa potena pa Ntewa vanon la 1:2—3:13

Pol piyani la e ðelaga kiena yaru naña lelaga 4:1-12

Pol piyani la sape yoko Kristo wasuþe sina 4:13—5:11

Pol kila make kiena vianena lala 5:12-22

Visena maro 5:23-28

*Visena na sumo*

<sup>1</sup> Inu Pol, nemio Saelas a Timote, imimi telu mekekara paþisi nasirien m̃aki nini imi van amiu, þegas nen li na lelagaena lala e suññare na pulkumali naña Tesalonaika. Memlelaga sane kiamiu malena lala asike ruru ga e Arimata Ntewa amio kieta Suþe Yesu Kristo, ana memlen

ke sane lemamiēna a sum̃arena sike amio amiu punu ga.

*Pol lala akekara komin namasisuena kiena le Tesalonaika lala*

<sup>2</sup> Lelaga, silaga na memlen ke pan Ntewa Armata, monar mevisa potena vania vanon amiu. <sup>3</sup> Mesitoṃal amiu ke e kiamimi leniena lala sanini, taṓatete sinemimi ṓesania sanape naṓa kiamiu naviawaena, amiyuṃae ṃarera tavevea, a sanape naṓa kiamiu na sinesiiēna pimi plamolue ke e kiamiu ṓelaga wo lala, a sanape naṓa kiamiu sitomen piayavi lala kila amiu asuṃal ṃarera ruru ga po e kieta Suṓe Yesu Kristo.

<sup>4</sup> Erau lala, mepisuluṓar sane Ntewa pe sinen sii amiu re ga poli, ana naga kilologia amiu ṃena sane ape kiena lelaga, <sup>5</sup> komin pogos naṓa memlologon lologena wo pan amiu, naga sa ga pe visena korena re kiena yaru poli, ana naga pimi pan amiu sane visena urmi tai naṓa ṃarera. Mareraena kiena ne Ninuna Wa sike ea, a naga miyur ruru sinemiu la pano-o amlelaga.

Amiu akilia kiamimi ṓelaga la pogos naṓa mesike memio amiu, moṓaryon paṓisi na kilaen sur punu ga naṓa mekilia mekila na kilaen naṓa alelaga, <sup>6</sup> ṓisi na atolia, apimi sa naṓa ape kiamimi nataveveena lala, ana pe kiamimi re ga poli, apim ape nataveveena kiena Suṓe. Pe sur korena ga naṓa lala taṓena la akila pupia naloge viowaena a akila amiu atol pog ṃarera e pogos la nene, ana aporworun ga lologena wo, ana pupia kekarena kiena ne Ninuna Wa sike e amiu. <sup>7</sup> E

kiamiu ñelaga wo la nene, sane akuspo yomãarua, asumon vena kipianen mrapa van li nalelagaena tañena lala e lepas na yo la naña Masitonia amio Kris. <sup>8</sup> Lologena wo kiena Suñe molue e amiu pa vanua, pe e re ga e yo lua nene poli, a pa mñena yo punu ga la ne, kila yeririna la amlogeyu kiamiu nalelagaena e Ntewa ñisi rui.

Naga nene po pañisi, ana nanagane sane e yo ya naña visae meva si ea, pe sur na visaen re si poli, komin visena la punu ga pimi e amiu pa tol la rui! <sup>9</sup> Pe mesun re si pan li tañena la nene poli, ana lala asun ke sina ga pan imimi, apisayu sanape naña amiu le Tesalonaika lala añure imimi pimi pun amiu, a sanape naña apilopu amiu, akuwan plan kiamiu nono na marena lala, apim ape yeririna kiena ne Ntewa Mali naña pe lelaga. <sup>10</sup> Ana amio naga nene, apisayu ke mñena naña amiu, asumãal ke mñarera, asumãa asumãate ke narina ne Ntewa, Yesu. Naga yoko imi mñalivin ita sina ga, vanon Ntewa pisirlua sina ga naga rui taulu marena, ñisi na ligana naga imi mñalivin ita yam na luania, vena tamalia itaena e pogos na lipereena na pimi ke ne.

## 2

### *Pol pisayu kiena yuñena pogos naña sike gar Tesalonaika*

<sup>1</sup> Erau lala, memloge visena tai asape memiyuñae piowa ga, ana nesitom nesape apisu kilale sane kiamimi nayalin amiuna naga ñar mras wo lala moki. <sup>2</sup> Nanua susumo,

pogos naŕa memiyuñae gar Piliŕae, apis kar ke sanene pan imimi rui, a sa naŕa amiu akilia pa rui, pogos naŕa meñalivin amiu, akawe imimi ke sina ga paŕisi. Ana mepisu sane Ntewa miila imimi mñaga, pe memaraun re naloge viowaena poli, moŕyaron ga na lologonen lologena wo van amiu.

<sup>3</sup> Memlologon pan amiu, ana nekilia nevisa nevisave kana visena lala pe sa re naŕa yar laŕas apisasa ke ne poli. Pe amolue re ga e kiamimi na kila palen tai poli, pona e kiamimi na sitom viowaena tai, a pe naga re ga naŕa metaŕali na were kare amiuen e poli, peraga.

<sup>4</sup> Pe sa re nena nene, ana e pogos nene, imimi sane yeririna la naŕa Ntewa mligan kiena lologena wo e limamimi, ŕisi na mepim mepisawal kiena visena nalelaga nene pan amiu. Imimi na pe memiyuñae re naŕa yeririna la avisu imimi sanape poli, ana imimi sinemimin ga mesape vena Ntewa kilia kekaran sur ya naŕa memiyuñaenia, komin naga ga kilia sur ya naŕa sike e losineta peve taaga. <sup>5</sup> Amiu akilia ruru po sane pe mepimin re nakuwanen visen kiki pona visen vilave la van amiu poli, a Ntewa kilia ruru mñena sane pe sinemimi sun re kiamiu sur tai poli, pona mepimin vena visa kotalia amiuena.

<sup>6</sup> Ana e pogos mñena nene, pe memla re nena sitomena tai vena kilaen naŕa sane amiu pona yar taŕena lala ayeluar kiamimi kia.

<sup>7</sup> Pe lelaga naŕa mepimi moñalivin amiu sane li nalologena lala kiena ne Kristo, naŕa mesmesun sane monar akila sur ve moki vena visuar imimiena, ana pe mesitoñal re sur nene poli.

Imimi mepimi memalum ga, mekila pan amiu sa ga naþa auya tai pagan narina. <sup>8</sup> Mekekaran amiu sanene paþisi wa, sinemimin mevisaw-ilwilin lologena wo kiena ne Ntewa van amiu, ana memloge sane mepinaia amiu paþisi, vano-o mesuñã metañan kiamimi malena vena iilaen kiamiu malena.

<sup>9</sup> Erau lala, nepisa sanene, pe nepisokan re poli, komin akilia asitoñal sanape naþa imimi memninu e yuñãena urmi na limamimi e pogos nene. Memiyuñãe ea legiena a kolemalko, vena kilaen sane pogos naþa mesike memio amiu memlologon lologena kiena ne Ntewa, pe mekila re urmi pan amiu poli. Imimi ga mepisuar imimi, pe amiu yar re nena tai naþa pisuar imimi poli, peraga.

<sup>10</sup> Imimi mesitom mesape e maramiu, a e marana ne Ntewa, mekilia mevisawal mesape pogos naþa mesike likan amiu li nalelagaena lala, kiamimi malena pe sur tai piowa re e poli, memes ga, a pe wa ruruia. <sup>11</sup> Pona asitoñal ke yo wa, naþa mekila pan amiu sane ata tai naþa naga kila po paþisi e naiilaen malena kiena ne narina lala.

<sup>12</sup> Mekila sinemiu la malum ruruia, memla visena na iilaaren la pan amiu, a memiilaar kiamiu sitomena lala vena monar akila kiamiu malena la memes ruruia e þelaga lala kiena ne kieta Ntewa, naþa naga ga pio amiu vena aim loyũã e naurarena wo na kiena nasuþenena.

<sup>13</sup> Sur taþena si tai naþa silaga mepisa ke potena pan Ntewa paþisi vanonia, nane kiamiu þelaga pogos naþa lologena wo pimi porun amiu.

Amiu amlogeyuia, ana pe akovenlua re poli sane pe visen kien yar ga tai, ana apisuia sane pe lelaga, pe visen kiena ne Ntewa lelaga. A amiu naþa amlelaga ea, apietavan losinemiua pania pano-o sumãa miyumãae ke e kiamiu malena pimi tol nanagane.

<sup>14</sup> Wolai a vineu lala, nekilia sane pogos naþa amlelaga, pe piavi re poli naþa yar la nae ke sina ga pun amiu asumãalun na kilaen viowa van amiu, kila apane pogos m̃arera tai paþisi. Sanene na piowa ga, ana e lele nene amiu amiyal ke ga e mrapa taaga ga naþa li nalelagaena kiena Yesu Kristo e sumãare kiena ne Ntewa e lepas nae Yutea amiyal e nanua susumo rui. La m̃ena, pogos naþa amlelaga, ana le Yu m̃ena la akila kare la paþisi! <sup>15</sup> Ana þelaga nene, le Yu la asumãa akilakila kemua nanua susumo rui pimi. Susumo, pe sinelan re navisawalena la poli, siraunia, lala ke sina naþa akila am̃emar kieta Suþe Yesu mare, a lala ke sina ga naþa asumãa am̃ene imimi yam mok rui. Sur la naþa asumãa akila ke ne, Ntewa pe kekearan la re nena vanonia, komin asumãa akakawe visena silaga. <sup>16</sup> Mesumãa memlologon ke lologena wo pan la ga naþa pe ape le Yu re la poli, ana pe sur korena ga naþa pulmas nene na tamaliaen kiela malena, ana le Yu la nene asumãa apisawo imimi ke ga, pe sinelan re naþa meva mevisawal van la poli.

Kiela þelaga viowa la nene, asumãa amiyakol ke sina metavan kiela mlamulena viowa la naþa amiyumãaen la nanua pimi, kila sane nanagane

---

**2:14** Yumãaena 17:5    **2:15** Yumãaena 9:23,29, 13:45,50, 14:2,5,19, 17:5,13, 18:12

kiela naviowaena la nene piowa manene laa. Amiyumãen sanene pano-o pe asitom re sur tai poli, ana tekilia sane pupia na sinekar kiena ne Ntewa pitomin la ke rui.

*Pol naga sitom la pañisi vena visu la si yam tai*

<sup>17</sup> Erau lala, mesape mevisawal van amiu, mesape memligan amiu nanua ga ne, meþure mepa li ve tokak ga, sinemimi miye amiu ga, sinemimin mesape mevisu si maramiu. Lelaga, tesutetai e tasneta, ana e losineta, tepe taaga ga. <sup>18</sup> Mesike sanene, mesape mekirawal si mrapa tai na imãsen pun amiu, ana inu Pol neþaryon yam moki pañisi, ana yar viowa naþa Yermare, naga kila wo ke silaga. <sup>19</sup> Ana komin ya ne mesape meim mevisu amiu sina? Naga nene komin a sina naþa mowasine la? A si naþa kila imimi mekekara? A si naþa ve kiamimi mras nen yumãena wo, naþa mekilia melogewonia pogos naþa visae kieta Suþe Yesu vim sina? Pe yar taþena re si po, amiu ga narui! <sup>20</sup> Pe lelaga pañisi, amiu na sane tropi nowo tai naþa metauluia, apim sane pupia purþes nen sineyeena na kiamimi malena.

### 3

*Pol pisayu naþa pitetalia Timote pa katen la nanua rui*

<sup>1</sup> Mesitomãal amiu mã sanene pano-o, mepisu sane peraga, imimi yar tai monar imi katen amiu sina. Pisi na mepisa mesape imimi lua Saelas monar mesu Atens sumo wa, <sup>2</sup> ana



yoko Timote iñasu pun amiu. Wolai nene, memiyuñäen yuñäena kiena ne Ntewa veraga memio naga, vena kilaen lologena wo kiena ne Kristo va vanua, ana nepisu sane naga pe yar wo tai na katen amiüena. Nekilia naña naga kilia iilaar amiu, kilia iila amiu vena kiamiu naviawaena suñalu ñarera silaga, <sup>3</sup> vena ve sinemiu la kurkurun kare re pogos naña avane pogos ñarera la naña asuñä apimi. Pog ñarera na sanini, tekilia ruruia sane pe lepas na kieta malena tai, naña ita li nalelagaena lala tañatete toure tania. <sup>4</sup> Ana visae tesitoñal ke ga wa, tekilia sane pogos naña mesike memio amiu, mesuñä mepisawal ke pan amiu, mesape mepisu ke pa rui sane yoko ve ve piavi re, yoko monar akila viowa van ita. A nanagane, sur nene pimi kate sa ke ga nene rui, naña amiu nena akus ke pañisi. <sup>5</sup> Sur ne na nene kila sane in na nemloge sane pe pon re nesuñä sanene poli, ana monar nekila sur tai vena neloge lologena tai sane amiu asike sanape. In na nemarau li ñaga sane yar viowa na tañalien yar nene, sa lual kiena mrapa tai nakila amiüen aloru rui, ñisi na nesape nelogelia sanape, asuñal ñarera ke ga wa po sanape, komin piowa ga naña kiamimi yuñäena wo lala e amiu imi ve sur korena sina ga. Sanene nepitetalia Timote piñasu.

*Timote ñasuñe si puna ne Pol amio navisaplana wo e lepas puna ne la nae Tesalonaika*

<sup>6</sup> Timote piñasu pisu amiu, ana nanagane ga ne naga ñasuñea pimi katen imimi. Pogos

naña pimi, þar lologena wo, pisayu sanape naña kiamiu naviawaena amio þelaga na sinesiena keviu ga sike na wa, suña poga ga, þisi na kila sineu kekara keviu. Naga mla kiamiu visena pimi pan imimi, sape asitomal imimi ke silaga, ana sinemiun visuen si maramimi paþisi, sa ga naña imimi mena mesape mevisu si maramiu. <sup>7</sup> Ana pe sur korena ga naña mesike memloge piowa sanene e yo nini komin naviowaena naña akila ke pan imimi, ana pogos naña memloge lologena na kiamiu masisuena amiu kiamimi erau lala, memloge sane pisirlua si kiamimi sitomena. <sup>8</sup> Memloge naña asumalu ke marera e Suþe, þisi na kila memloge sane memal ruru sina.

<sup>9</sup> Pogos naña memlen wo amiu ke sanene, mepisu sane pe imimi re naña mekila ke sur wo tai pan amiu poli, peraga, ana amiu na akila ke sur wo tai pan imimi, komin amiu akila ke naña mokus pupia kekarena e losinemimi, pano o pe kiamimi visen re si tai navisaen potena van Ntewa vanon poli. <sup>10</sup> Naga nene kila sane sinemimin manene paþisi vena melen kolegiena a kolemalo, sane sa mekilia mevisu amiu sina ga, visae narin lele tai naña kiamiu naviawaena tai kulkulul li maga, ana yoko mekekaran vaþisi naiilaen si naña kilia marera ruru sina silaga.

<sup>11</sup> Sur ne nanene naña nemlenin ke marera nanagane, sane kata Ata Ntewa amio kieta Suþe Yesu, avietavan kiamimi mrapa vena mekilia meim meialiali amiu sina. <sup>12</sup> Pano tol pogos nene, nemlen ke pa Suþe, nepiun ke sane yoko naga kila kiamimi sinesiiena kapuru ke imi sane

kokonia ruru kiamiu malena vano-o tataroi va tol si yar tañena lala, imi ve keviu manenea maran taaga ga sa naña kiamimi sinesiiena e amiu. <sup>13</sup> Ana amio naga nene, nemlen sane naga ligan sitomena wo tai naña m̄arera ruruia e amiu, vena akilia auarar ruru kiamiu malena vano-o tol pogos naña kieta Suñe Yesu imi kate sina amio kiena li wa lala, ana e pogos nene akilia asum̄alu e marana ne Ata Ntewa naña amerarava po, ape wa ruru ga asum̄a ga.

## 4

### *Pelaga na malena naña Ntewa sinenania*

<sup>1</sup> Erau lala, pogos naña mesike memio amiu, mepian ruru amiu sanape naña amiu akapuru laa sane e ðelaga na malena naña Ntewa sinenania, ana memloge sane akila lili m̄a rui, naga po pañisi. Ana e kia kiena Suñe Yesu, mom̄areran van amiu sane ve aligan re, awaryon ga kilaen vano. <sup>2</sup> Suñe Yesu mligan kiena navianena lala e limamim̄i na visawalen van amiu, ana akilia ruru la rui. Sanene, popon atavevea.

<sup>3</sup> Poga, sur ne lañas nanene naña Ntewa sinenan kiena yeririna la monar ayum̄aenia. Kieta malena monar ve wa ruruia, sane ve tekila re ðelaga viowa e lepas na yerm̄ene amio sira. <sup>4</sup> Ita punu ga monar tetaveve ruru mrapa mesmes na talopaena, vena yerm̄ene kilia su amio wona na sira naapo e ðelaga naña merarava ruruia, vena ve akila kare re si kiela kia lalua. <sup>5</sup> Sanene, pe pon re yaru talopa koskos poli taveve ga kiena sinenanen sira m̄arera, komin nanene pe ðelaga ken yaru na yemalolo ga lala, naña pe akilia

ruru re Ntewa poli. <sup>6</sup> Visae yar la akila ke ga ðelaga wo silaga e nini, yoko wo vaþisi, yoko ve akila kare re si sur nowo naþa pe kiena kiela puruvi taþena lala. Amiu monar avisu ruru yo nene, vanon Ntewa mla ke nakoena silaga pan yeririna la naþa amlor ke e mlamulena viowa kar la ne sanene, sa naþa mepisawal pan amiu rui, mesape maraþe amiu.

<sup>7</sup> Asitomveveli naga nene. Pogos naþa Ntewa pio ita tepim tepe kiena yeririna lala, naga pe kila re vena kieta malena imi ulen si ðelaga la naþa pe merarava re poli, a naga kila vena sane kieta malena imi ulen ðelaga la naþa ape wa ruruia. <sup>8</sup> Sanene na, yar naþa pe kekaran re navianena la nene poli, naga monar visu kilale sane pe pe visen ken yeririna re la naþa naga miaslua poli, ana miaslua ke visena kiena ne Ntewa, naþa mligan kiena Ninuna e ita naþa sane Ninuna naþa pe wa.

<sup>9</sup> Sur si tai naþa nesape nesunyu van amiu, naga kieta ðelaga ita li nalelagaena lala, naþa monar tekekan ita tepe namratava taaga. Sur nene amiu akilia ruru þisi rui, pe pon re nesiriyu si van amiu poli, vanon Ntewa kilapian ita make ga rui sane naga nene pe sur wo tai po tanea paþisi. <sup>10</sup> Nekilia sane amiu akila ke pa sanene rui pan li nalelagaena lala nae Masitonia po paþisi, a nesape nevisa ke sina ga, nesape amiu auarar ruru ðelaga wo nene, akila imi ve keviu laa sane likan amiu.

<sup>11</sup> Nanagane na nesape nesiri si sur laþasia naþa popon sane awaryon na kilaena. Nasumo, ve oulaula kar re, ana osu ruru ga. Nalua, ve

okian re kunuũa va e kove kiena yar taũaena lala, ana ovisusu ga kiuũa malena. A tai sina ga, ve ove yowen re, ana oyuuũae m̃arera wo e yuuũaena naũa sike e lumuũa, sa naũa mepisawal susumo rui. <sup>12</sup> Visae okila sanene e kiuũa malena legiena punu ga, yoko la naũa pe amlelaga re poli akilia avisu ruru ko, apisuluũaar naũa pe yaru taũaena re la apisuari ko poli, a ko ga osuũa opisuar ruru ko.

### *Nawasuuũaen si kiena ne Suũa*

<sup>13</sup> Ana erau lala, nepisu sane popon amiu akilia lili uũa sur la uũasa e lepas kiena ne ita uũasa naũa amomalio rui, sa naũa akovio e yomarava. Yaru la moki naũa pe amlelaga re poli, amaraun marena, asitom asape yar la akovio yoko viowa vaũaisi van la, ana kila sane pogos naũa lala tai kovio, atagin paũaisi.

<sup>14</sup> Ana ita na sa re nene po, komin temlelaga sane siraun naũa Yesu mare e lak torovia, naga suũaal mal sina ga, ana e uũalaga uũa ne nanene, temlelaga uũana sane lala naũa ape taaga amio naga amare, yoko Ntewa kila la ave taaga amio naga amal sina, ana awasuũae aimi sina amio naga.

<sup>15</sup> Nekilia nevisa ve lelaga van amiu, sane taveve visena tai naũa Suũa ga pisa, ita naũa temal ke ga wa tol pogos naũa nawasuũaena sina, ita taũatete teva metava sumon lala naũa akokovio rui. <sup>16</sup> Peraga, ana sur naũa kate e pogos nene sanini. Parin navisi nae ma e peni vion manene va metava, a kumasua kiena

ne Ntewa yelu, ana kieta Suŕe vetan ma e peni vitom tano, yoko li nalelagaena la naŕa amarmare asike ne, yoko asuñal si sumo. <sup>17</sup> Pisi na, ita naŕa temal ke ga wa tesike yomarava, naga wereplan ita mñena teva metava temio la, tekoma likan lul meta e sinapane, teva tevitawe kieta Suŕe meta e yo yau. Teva sanene, ana yoko tesike lue ga temio naga.

<sup>18</sup> Navisaarena nene naga po paŕisi, ana popon teiila ita silaga e sitomen wo la nene.

## 5

*Monar tesururuia, tekirava; ve ve piavi re na naga yoko vim*

<sup>1</sup> Erau lala, nekilia sane yeririna la moki sinelan asave akilia sur la nene yoko vim kate e legiena ya, pona pogwai. A naga nene pe pe kiau re nene naŕa nesiriyu van amiu poli, <sup>2</sup> komin akilia pa rui sane sur nene pe kiena re yeririna na kilia poli. Naga ŕarlologia ga sa naŕa yar na vinauena kila kiena yuñena kolemalu. Naga taŕatete visawal ŕesania pog ya naŕa naga imi!

<sup>3</sup> Pona naga imi e pogos tai naŕa yar la apisa ke pan la, asape “O, nanagane pe pog na suñarena pa rui!” Pona asape “O, nagane tesike e pog wo narui!” Lala aminue ga, ana sur nene naga sa naŕa auia tai veraga ga mloge sa naŕa kiena sisi vaeme narui. Ana pogos nawasuŕeena ve sa ke ga nene, naŕa yoko yeririna la aila ga, sane pe asitoñal re poli, ana pupia pog viowa imi katen la, naŕa sane taŕatete nena aur matania.

<sup>4</sup> Ana amiu erau lala, pe asu re si e pupumalko poli, ana visae pupia legiena nene imi kate, nesitom pule ga sane amiu akilia ailania, sa naþa pe yar na vinauen tai pimin kiamiu sur lala. <sup>5</sup> Pe tepe yeririna na yemalolo na kolemalore si poli, ana tepe yeririna na yomerarava na legiena rui. <sup>6</sup> Sanene na, kieta sitomen la monar tavilo ruru silaga, touarar ruru kieta malena, vena ve teve sa re yeririna taþena lala na yemalolo. <sup>7</sup> Yumñaena la naþa asumña amiyumñaenia, la asumña amun mña wii pano-o wii mñe la, þisi na asumña amomomalion ga, <sup>8</sup> ana ita naþa tepe yeririna na yomerarava, monar tekila kana yumñaena mesmes lala. Tekila kieta malena la mesmes ruruia, tekilawo yepeta e þelaga na viawaena amio þelaga na sinesiiena, a monar teyanwo þarita e nalelagaena mārera naþa tesape yoko Ntewa monar tamalia ita. <sup>9</sup> Naga nene pe pon re naþa kieta sitomen veve lua poli tesape Ntewa tamalia ita pona ve tamalia ita re, komin naga pe kiena sitomena re naþa sape yoko kiena li nalelagaena lala atol nakoena poli, ana naga pisaaria sape yoko tetol natamaliaena nene naþa Suþe Yesu Kristo tauluia pe kieta. <sup>10</sup> Naga marewo ita, vena kilaen sane visae wasuþe sina, pe sur korena ga naþa visae tomomalio, sane tokovio pa rui, pona tetavilo, sa ga naþa temal ga tesuña ga, ana kieta malena su ruru ga amio naga silaga.

<sup>11</sup> Visena ne na nene popon amiu avisasa vena iilaaren kiamiu sitomena, aiila amiu vena

yumãenen kiamiu naviawaena imi m̃arera ruru laa sane, sa naña nekilia sane amiyumãen ke pa rui.

### *Visena maro*

<sup>12</sup> Erau lala, nesape neviun m̃ena van amiu vena avisu kilia ruru li la naña amiyumãe m̃arera ke e yumãena kiena ne Supe likan amiu. Nanene komin naña naga mligan la vena ave supe amiu, avian amiu. Amiu monar avatanon ruru la, <sup>13</sup> aligan la asu metava e kiamiu sitomena lala, akekaran la, vanon yumãena la naña amiyumãen ke ne. A p̃isi na, amiu ve akakawe amiu re, ana sinemiu la monar ve lemam van amiu silaga.

<sup>14</sup> Nepiun m̃areran tan amiu puruvi a vineu la, visae amiu p̃as ape yowena, popon avis van la vena yepela m̃ae la sane. Visae amiu p̃as amarau, avis van la vena akilia asumãalu m̃arera. Visae lapas yepela mavi, avis van la vena iila laena. Ana e la punu ga nene akila sane kiamiu sitomen la viayavi ruruia.

<sup>15</sup> Amiu awaryonli sane visae yar tai kila viowa van amiu, ve akilamaran re si viowa vania. Ita monar tekilali sane sineta wo ruru van ita silaga, a sineta wo ruru m̃ena van yar taþena lala.

<sup>16</sup> Pe sur korena ga e sur ya naña imi katen ita, ana tekekara silaga, <sup>17</sup> telen silaga, <sup>18</sup> tevisa potena van Ntewa silaga. Na nene kiena sinenana naña sape teyumãenia, e lepas pun ita naña tepe kiena Yesu Kristo.

<sup>19</sup> Sur si tai, visae kapi kiena ne Ninuna ne Ntewa vivaga ruru ke yo tai, yoko weñaren



toko, <sup>20</sup> ana visae yar tai suũa pisa plan ke navisawalen lala, ve avisalele kare re naga, <sup>21</sup> ana asitomveve ruru sur punu ga. Naga naņa po, auarar m̃arera, <sup>22</sup> ana naga naņa piowa, aligania. <sup>23</sup> Nanagane nelen sane Ntewa ga, naņa pe Ntewa na suũaarena, kila sinemiu amio kiamiu sitomena a kiamiu malena ve wa naņa ve wa ruruia. Sineun manene nesape pogos naņa visae kieta Suņe Yesu Kristo wasuņe sina ga, yoko ninumiu wetelu, losinemiu wetelu, amio tasnemiu wetelu, ve narin kinakinas nen kororak re nena tai se e la. <sup>24</sup> Naga naņa piolua amiu naga pe masisu lelaga, a naga yoko yuũae m̃aga ve sanene vano.

<sup>25</sup> Sur maro, nevisa van amiu erau lala, neviun tan amiu sane ve sinemiu p̃esan imimi re e kiamiu leniena lala. <sup>26</sup> Avisu pokolulagi po pokolemalo van li nalelagaena wa taņena lala naņa asike ne, <sup>27</sup> a e kia kien Suņe, nepisa sane luũaki nini, aulolua e marala.

<sup>28</sup> Lemamiena kiena ne kieta Suņe Yesu Kristo sike amio amiu.

Inu, Pol.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 3 Mar 2023 from source files dated 22 Nov 2019

ee028e1c-7e53-571d-8041-681daaf580e8